

Kurteçîrok

Balûlka Şekirê



Hesen Silêvaneyî

APEC

BALÛLKA ŞEKIRÊ

Kurteçîrokêن

Hesen Silêvaneyî

**ISBN: 91-87730-66-9
APEC**

Kurteçîrok
BALÛLKA ŞEKIRÊ

Hesen Silêvaneyî

Weşan no:66

Utgivare: Apec-Tryck & Forlag
Box 3318, 163 03 Spånga/Sweden
Tel. 08-761 81 18 • Fax: 08-761 24 90

ISBN: 91-87730-66-9

APEC

Têbînî

Ew pirtûk bi riya kek Xalid gehiştê destê me. Dema me dît, ku nivîskar ji başûrê welêt e û xwes-tina wî heye ku bi latînî pirtûka xwe çap bike, em pê kêfxwaş bûn. Pişti ku me pirtûk di çav re der-bas kir, me dit çewtiyên rênivîsê gelek bûn...

Ji ber hendê çapkirina wê dereng ma. Rastkirina rêzimanê wê me li gor rêzimanê Mîr Celadet Be-dirxan nivîsî û ferhengokek biçûk jî, di dawiya pirtûkê de berhevkir. Ji bo vî karî, em spasiya Beşîr Botanî û Amed Tîgrîs dikan.

Em hêvidar in ku birayêñ me li başûr û rojhilata welêt jî, weke me bi latînî binvîsin. Ew jî da ku em ji hevdu têbigehin.

Di gel silavêñ germ!

Weşanêñ APEC

Balûlka Şekirê



Balûlka Şekirê

Bêhnek xweş ma bê deng û diqulaç û dîwarên şkefta tarî û bêhinteng fukrî. Heta tirs û tariyê, xwe kirine yek û qesta wê kirin û rahêlanê. Yekser "Helûka" çar salî xwe avêt di danga dayka xwe û serê xwe yê qijavij û berdayî hişk bi singê wê vena:

-E... Ez bîrsî me o da ... min balûlka şekirê divêt.
Babê wê bi rex ve lê heytand:

-Dê hiş be kiçê, ma nûke demê hindê ye? Helûyê berda giryê û destêن xwe bi çavêن xwe venan û serê xwe ji sîngê dayka xwe vekir û bi hîvî berê xwe dayê...bi ron-dikan digote;

"Ez bîrsî me o da"
Bê agir cerg û hinavêن dayka wê li ber rondikêن bîrsê û

jariya zaroya wê ya nazdar dihatin sotin.

-Helûkê, daygoriyê, bes bigrî û dilê min ne sojîne. Eve ez dê biçim bo te balûlkeka şekirê çêkim û bînim, û ci diqewimit bila biqewimit. Mêrê wê kîskê tütinê ji ber şûtka xwe râina derê û ma di pê xwe yê rast yê seqet fukrî. Sê sal di wê gavê da kuştin:

-Ûsif heme kutanke û nehêle kes nîzîk bit çetir e. Ne şola te ye... Xwe jê dûr bike... Bela ye.

-EZ dizanim bela ye û ne yariyek e. Lê bêhna min qet nahêt demê ez vê gula nepeqî hosa çiklandî li ber derê malê dibînim... Ez dê li her...

-Ûsif...Ûsif

-Haha... Alya.. te çi ye?

-Çavê te li kiçkê bit ev e ez ê biçim!

Dizanî ji axavtina wî bê wuc e, kes wek wî serreqiy wê nas nakit, lê di ser hindê ra gotê:

-Dîna Xudê neçe... Neçe... Ma te haj qîre qîra firokên segbaban nîn e.. nê li vêrê guhêne me kerr kirin.

-Ma tu min nas nakî Ûsif? Axavtinê xwe di avê da neberde.

-Ma tu li mirina..." eûzu bîllah"... Pîrejineka serspî û alek qurmiçî nêzîkî wê gotê:

-Rûne xwarê û neçe, kiça te her ji birsa namirit. Ewî

pîremêrê tisbiyên reş di destan da jî gotê:

-Alya... navê Xudê bîne û nebe belakir.. Hema tu derketî, firoke dê cihê me bibînin û dê avêş şkevtê... Alya yê her du çavêş Helûkê maçî kirin û berê xwe da pîremêrî û bi zimanekî req lê zivrad;

-Netirse sofî Elî, netirse! Tu namirî... hindî em xudanê xwe û hewe bin, her dê halê me hosa bit... Ma nebes e jîna serşoriyê sofiyo?

Alya hêj ji biçûkatî zîrek û bi zefer bû... Di gel babê xwe diçû çiyayê Bêxêrî û dar dibirîn û girêdidan û dida pişta xwe qesta malê dikir...Jinkên gundî jê diman hêbetî û mendehoş û sehma wê ketibû dilê hemiyan.

Kefika serê xwe baş şidand... Lewendiyên xwe girêdan... Dangên kirasê xwe li nav tengê pêçan, û bixar ji derê şikevtê derkevt û qesta gundî kir, yek terq nedizanî ew ber û berzîvên di rêka wê da ci ne û ci nînin, ci xem ji stirya ne dixwar "ma li ser darê dunyayê min kî dî, heye ji bilî te merg goriya min Helûkê ?..."

Mîna xûsara biharê li ser ruyê gul û giyayê, xuhdanê leşê wê û nav çavêş wê şil kiribûn... Car cara da bi destê xwe hindekê jê zuhaket û gelek caran jî bi livka kevinka xwe... Hêj ji dûr ve dît, dûkel û tem e dînan yêñ bi ser gundî vediçin...Bê hemd, ji nîva dilî rahêla axînkekê wey li minê ezê... Malêñ me jî sotin.. Newêroka bo me zîrek in, em ên dest vala û bê çek... Heyla Xudê hûn kuştîn.

Piyêñ xwe siviktir kirin... Çavêş xwe ji gundî nevekirin heta gehîstê. Xaniyên gundî, ser û bin yêt bûn yek... Qûtê wan yê disojit. Terş û kewal yêñ di xwîna xwe ra digevizin... Qabkêñ doşka û saçmên topa tijî kolanêñ

gundî ne. Bi dilê mirî û hinavêñ kuzirî û bi çavêñ girî hêdî hêdî qesta xaniyê xwe kir. Oda qûtî ya hatî xwarê bi ser yek da. Karîte ew zire karîte yên bûn çar-pênc ker.

Bagurdanê serbanî, li nîva hewşê qet qet e. Kentora wê ya bûkanyê, muşekê ya di erdî ra birî ye xwarê. Hêj wesa bi kul û keser ya di xanyê xwe yê wêrankirî fukirit. Ji dûr dengê firoka dilê wê quتا. Bi piyên bê rih bezî bo alê kehniya jinka li milê rastê yê gundî, xwe avêt ber kevrek mezin. Du firok dîtin bi nizmî di gel yek diffîn. Dengekî bê qam tîj jê dihatin. Her li dorêñ gundî dulan û zivrîn, paşê barê mirinê li kavilêñ gundî reşandin û bi keyf xwe bilind kirin esmanî wek du "teyrêñ" têr xwarî û qesta bingeha xwe kirin. Alya zivirîve gundî, li şûna cihê müşekê çaleka çar-pênc gez fireh dît. Ya jehatî heme herdu destêñ xwe berî esmana ve kirin û bi dengekî bilind qêrkir "Xudê, bu xatra Qurana te ya pîroz ew xêrê li ser dunyayê nebînin hindî hene bi ci heq em hêlan bê kolk û xanî? Ya Xudê tu heqê me fiqîr û jaran wan zala bistînî... ya Xudê... ya Xudê..." "Helûka minê dayê da bo te balulkek şekirê çêkim" li qotîka şekirê gera, li nav amanêñ bê rêz belavkirî dît. Sifreka nanî tijî nan û durik kirin "nûke bicûk hemî birsî ne wek tehlokê, bila ew ji bi xêra te bixwun..Ev nane têra hemya heye!"

Rêka çarêkek se'etê nemabû da bigehit şkevtê sê firokên dî li dol û nihala deng vedan û ezman şilqandin. Alyayê kir xwar da bigehit nihalê û xwe veşerît, lê yekser yek bi dûv ket û xwe nizim kirê û di tuxubêñ urteka pênc sed gezî de di dola hindav serê wê... Hercar da berrekî raket û têwerkit bê feyd... Piştî têr yarı pêkirîn û êciz bûyî. Devê doşkê lêvekir û mîraniya xwe lê diyar kir... Leşê wê pirt pirt kir...Û qesta alê rojhelatê kir û herdukêñ dî jî rîya wê girtin...

Qotîka şekirê li erdî ristî bû, xûna sor di gel têkel bibû,
sifreka nanî wek xwe girêdayî mabû...

Ji dûr ve dengek dihat û nîzîk dibû:

-Alya...Alya rewşa umer pira.. Te ci mal li min û xwe
xirab kir.. Edi çewa dê hedara Helûkê êt ...Alya...Alya

Ji dengên qêriyêن jinka, Helûka nivistî ji xew rabû, gote
havala xwe cinuyê:

Nûke dayka min dê bêt û dê balûlkek şekirê bo min
înit... Ez ê kim du qet, qetek bo min û ya dî bo te bilanê?

25.11.1985

Sibe bihar dê girnijit



Sibe bihar dê girnijit

Bi dengekî jar û melûl û harî bê tûxûb mîna zarokeka sava û têhnî li leyланека xîzê wê dibiriqit, li ber tîrojkên rojê radhêla qêriya. Hêdî hêdî û bi giranehî şev diborî û qêrîn û axînkên wê difirîn bo esmanê çandî bi pinîyêñ ewrêñ ji yek du sil...

Li wî koşê bê ser û ber ji oda bi ax spîkê boyaxkirî di-rejkirî bû. Li ser kudad keka reng jê çûyî û pêşî... Bî rex ve ew pîrejina dêm qurmiçî û pir rêz û xîçêñ kûrêñ têk firîn bi keyfa xwe. Li nîva herdu çavêñ bazîdayîn qu-qilkî, tenahî û germî û evîn geş bû. Dev û lêvên wê caran ji ser yek radibûn û hindek quesên olî yêñ taybetî bi piste pisteka nizm digotin. Bi hemî zanîn û aqildariya xwe û bêhn firehî harîkariya wê dikir... Gelek caran, hawarêñ axê kunkin dikirin û diborîn mîna birûîsyâ û digehiştin guhêñ wî, bi hêz û reqî û li nîva dilî akincî dibûn, ta hest dikir dê çerx li wan gavêñ hilma mirinê jî di firit, raw-estit... Li çavan dîyar bûn şûnwarêñ rondikêñ hîviyê û

daxwaziyê ji xudanê şev û rojan, ku barê wê yê giran bi janêni mirovatiyê yên pîroz sivik bikit û ji wan wêneyên direwînêni li ber çavan dileyzin rizgar bikit..

-Dûkêl ji menqela wî ya dirêj kanî û kevn û pîs bi komelêni girovir yên yek çuda bilind dibûn û li jorveyê odê belav dibûn. Bi çavêni xwe yên zîq berê xwe dida tiştêni ne-ên dîtin û dûr. Her wesa berê xwe dida belgêni çulî yên hişk, û hatî xwarê li ser karîten barê serbanê sivik bi sanahî hilgirtî. Bêyî hemd û bêyî ku hay ji xwe hebit wek dîlekê nexoşyeka ji mêja, ket warê hîzr û bîra, ma eger ew... dê çê kim û dê çi rojek bê ifleh bit. Ya Xudê agirî û avê û hemu cîhanê, bo xatra navê rehmê, xêrê, navê sitêr û esmanan, tu gemya wê bigehîne ber lêva tenahîyê. Eve çend sal in ez li hîvya vê rojê. Ba min tu divêyî bi jarî û rîncberîya te, bi lawazî û dilpakiya te, min tu divêyî hişyar be min nehêlî bi tinê! Ne... ne tu min nahêlî... dê çawa min hêlî? Viyana te nahêlit mirin nîzîkî te bit...a...a ...Gulek biçûk dê li gulistana me vebit Û gîrnijit...Û em ê bi hîvî û viyan û xerîbî xudan kîn. Dê mezin bit...mezin bit û bêhna wê belav bit li hemu alan. Dengê wê...ah dengê wê, dê çend xweş bit, bi awaz bit, mîna mişwêna sûlavan li meha Gulane. Çend nerm û nazik bit, peyva "babô... babô..." Ewa her spêde zaroka min dê bêjît min ez ê te bim ber van mîrg û kaniyêni di singê çiyayî ra, ew ên qeşeng û dîmenciwan. Da bayekî pak û paqîj hilkêşî û viyana warê te di nav xwîna te da bigerit. Em ê bigehîn revdêni kewenî nikilsor û singrengîn, bi wan perêni jêhatî. Em ê silav kîn kotirêni spî ew ên hej firînê dikin her û her. Makî nabêjît em ê ji kayfa wek kotırka firîn û dadîn li bin dareka gûza şûştî bi befrê, û di gel gul û gul çîçeka, nêrgiza û beybûn û nesrînan leiyazîn. Ez u tu dê qêrr kîne stranan û bi çiyayê spî ve biçin û guhîjka bixwîn û tûrkê xwe tijî hêjîr kîn û bo dayka te bînîn...ha... Çi? Çawa? Dibêjî dê kiç bit? Ez nizanim. Ma

ez ê ji kî ye zanim? Bilanê...Bila..a..a...Xozî kor bit... Da cotî û kêlanê harî min bikit.. Ez ê fêr kim hemî şolan, gelek matî jê kim erê... Çawan e, erê ez ê fêr kim swarbûna hespî û vêrisiyê û wan ên hêzê û tengaviyê ew ên babê min nîşa min dan. Ez dizanim çavêن te dê wek yên min bin, ne gelek caran min tu ye dîtî û li ser xatra wan çavan, min guhê xwe ne dida xelkê, demê digotin:

- "Berde, berde. Xwe ji fêqiyê jînê bê par neke. Ma dara bê belg û rût û rewat bo ci ye? Bo xwe seh ke, jêke dî, da te jîk wek zelaman dîndeh hebit û navê te hilgirin piştî mirina te..."

Dilê min şedekî dida, ku her salekê dayka te dê bi hal kevit û dê bihêyi. Lê, bizane, jîna me giran û dijwar e, zîrekî û mîranî pê divêt... Ka çawan babê min imtîhan bi min dikir, ez ji dê bi te kim: "Cotyaro! Min çivta nêçîrê ya hêlayê li serê lutka ker firînî, eger te piştî seetekê anî ez ê te li rêza zelaman hisêb kim".

Ci caran ji bîra min naçit, ew gava babê min xwe di min werkirî û ez givaştim ber singê xwe, ez maçî kirim û gotiye min: "Ji îro pêve şêm bi dilekî rehet û piştrast fêqiyê xwe bibim, li bajarî bifroşim, tu yî zelamê malê li karwaniya min. "

Hingê min hest kir deh salên dihatin ser jiyê min û leşê min yê nazik û lawaz, yê dihête vekêşan û mezintir dîbit.

Ev çiqê yê şelwalê min dirandî û kevrê ez jê ferestîm û hilke hilka ez têda hemu ji bîra min çûn û dilê min di singê min da dikenî.

Lê ez dê nîv seetê bi tinê dim te nê jîn yan bûyî sew-keka pîla ye, ji berê aloztir bûyî. Lewma divêt tu xwîhê

ji bask û milan birêjî û ji min zîrektir bî. Da bişey pêngavên firehtir bavê û bi jîna nû ra bigehî û tam ke destkeftiyêن wê û jê bê behir nebe û n.....

"Ay babo ay Xudê.....ay...ay" gêriya wê ya dijwar ji xewn û hizran ïna derê: Ya Xudê bi selametî rabbit:.Hûr hûr cipkên baranê erd dişûşt li pey awazek xweş û nazik...Di gel xweştirîn dêngî di jîna wî da "Waq...Waq... Wa... Qi... Qi..." Bi hêzter, baranê lêkir û lêkir... Ji dilşadiyê neşya xwe bigrit... Pê li şermê kir û piya û keyfê dan pêşiyê û çu oda wê ne ji heşt qavan jê dûr... Dergehê darîyê reşandî bi bismarêن ser gunbabok vekir, û bi herdû çavêن xweşî jê difirîn berê xwe dayê, neşya biaxivit ji dîtina ewilî... Ezmanê wî nîv şikestî ma... Guhiştî, neşya hestêن xwe yên pir şadî mîna şadîyêن newrozê dîyar kit. Le "Nîsrîn" baş pê dihesîya... Ji nêzîk bû, dêmê we bi rengê mirnê bu... Geşatîya çavên wê ve-mirî bu... Enya wê ji çipkên xuhê mîna xunanvê sil bû... "Pa tu jêhatî yê hosa bi sirustîya xwe ya rast, bêy kil û kirasên şevbêrîyan. Xuh ji enyê malî û maçî kir:

"Şikir ji Xwedê ra bo vê dana pîroz û silametiya te.. " Ü girnijînekê xwe li ser lêvên Nesrînê helavêt û gotê :


-"Dê navek xweş lê bike!! "

Cotyarî berê xwe da kiça xwe ya navçav befrîna pêçay li ser sêhlê, bi rex deyka xwe ve û vîyana dilê wî bûn peyv û darijin:

-Sibe bihar dê girnijit, hej cegera min, Perwîna berfîn..."

Mûsil 12. 3. 1983

Mirina Serfiraz



Mirina Serfiraz

Dergehê oda siyê vekir, hindî Xudê hêz dayê palek pêra da. Dev û dev vî erdî ket. Şirka xwînê xwe di serî ra avêt. Ew patê reşê tarî yê her du çavêن wî pê girêdayîn ji xwînê şil bû.

Ew ne cara yêkê bû, ew çepelê pîs palan lê bidit yan zilehan danit bin guhên wî. Ev deh roj bûn, eve bû halê wî di destêن wan da, lewa bê deng ma û neaxivt...

Xudanê rîha, zincîrêن her du destêن wî vekirin, pate jî, ji çavêن wî vekir û di xwîna serî da. Hinek çipkêن xwînê ji eniyê malîn û bi du çavêن hîz û pir neviyan gotê:

-Hişyarо, xwe hişyar ke! "aqilê xwe bîne serê xwe û bibe mirov!" Xwe ji vî halî rizgar ke, an jî dê li ser dun-yayê cehenimê bînim pêş çavêن te û hestiyek saxlem di leşê te da nahêlim. Mîn çu kesê xwelîbiser û hespêwer wekî te ne dîtiye, qet kuro ma te divêt bimirî??

Bi koteka Hişyarî şiya serê xwe ji nav stuyê xwe bîlind kî. Destêن xwe ji erdî rakit û nîzîkî çavêن nîvvekirî bikit. Berê xwe da sûna zincîra li her du destan û bêyî

berê xwe bidit xudanê rîha, bo xwe got: "Kanî bu-sulmanetiya we? Kanî mirovatiya we? Erê, erê, destan di zincîran da bizînim! Ronahiyê ji çavan bidizin! Nînokan ji tiblan bînin der!

Hêdî, hêdî Hişyarî xwe rakir û got:

-Ez dê hinek rêzan ji helbesteka xwe bixwînim, eger tu jê razî bûyî, dê bi wê pişikdar bim.. Xudanê rîha girnijî. Çar didanên wek tevşîyên tûj di nav şkefta devî da diyar bûn:

-Bawer e serê te yê wek berî req. Piçek yê nerm dabit. Dê ka ezmanê xwe bigêre, ka dê çi bêjî?

Hişyarî berê xwe da xwîna xwe ya li erdî hişk bûye û peyv li ser lêvê livlivîn:

Welatê min

Welatê bab û bapîra,

Dê te avdim bi xuh û xwîna hat peşmergê me tu bi bîne

Welatê min

Welatê mîrxas û şêra

Dê bim birûsk li eniya neyara

Nahîlim biherifin kevnawara

Welatê min

Welatê nêrgiz û kewa...

-Bes, bes segbab, bes e
Agir ji çavan difîrî. Bêhîn lê teng bû. Enya wî bû girêk:

-Tu nayî ser rêka rast, eger min her du çavêن te ne înan derê, tu raweste?

Bi destekî, destê Hişyarî girt û bi destê dî ew perda kesk-veda..

Kursîkekê xuyakir... kursî bi Hişyarî dikenî û eger

şiyaba baxivit da bêjîtê:

-Jaro, Hişyaro bireve hêj tu neketî ber derdê min, derdê min derdekî gelek giran e.

Mîna gawiran, Xudanê rîha li Hişyarî heytand:

-Rûne ser kursîkê û paşî behsê serfiraziyê û azadîyê bike!!

Demê Hişyarî ew kursîka kar kirêt dîtî, tirsê dilê wî girt, rengê wî pêtî bû:

Ax kursîka pîs û bê bext, tinê Xudê dizanit ka tu dê çi li min kî? Ez dizanim tu çu ser û bera di halê min nahêlî.
Ax...axxx kursîka pîs!!!

Hizrekê dibir û yekê diîna, hinek peyv bi wêneyekî mij û moranî li ber çavan dileyizîn. Hindî hatê neşıya baş rîzkit, ji bilî van peyvan:

Li vê jînê min heye yek daxwaz

Ew jî ku her dem bijîm serfiraz.

Bê hemd, piştä xwe bi kursîkê vena... Cîhan li ber çavan biçük dibû ew xudanê rîha û kursîk û ode bi tinê.

-Helbestvano! Pişt rast be, êdî ez destê xwe nakim te. Tu û kursîk pêkve dizanin. Lê, bo cara dûmahîkê dibêjim te eger tu di fêstîvala me de, wek me divêt pişkar bi, te çi divêt em dê bidîn te. Pare, xanî, trimbêl, çi welatê te divêt em dê te hinêrînê, te çi got?

Hişyarî piştä ji kursîkê vekir û berê xwe da tilên destên xwe û got:

-Li min negire, ez neşêm dengê xwe bifroşim dijminê

welatê xwe, mirov bi hizr û bîrên xwe mîrov e, eger fir-otin, ew ma kelexekê bê rih û xwîn...

-Hêj ezmanê xwe dirêj ke lewçeyê lewçe!
Tibla xwe dana ser pişkoka sor, kursîk bi Hişyarî ve zi-virî û zivirî, ku xudanê rîha baş Hişyar nedidît. Ji nîva dilê reş dikenî û dikenî:

-Hah ...hah...ha...ha...ha hah Tu dê li ber singê me rawestî hey dînê dîn? Ha.. hah dê bixwe dermanê xwe, tu bi serveyê û hêj eve kêm e bo te û lewçeyî yên te hah...hah!!

Demê bo cara duwê tibla deynayî ser pişkoka sor, kursîk rawesta. Hişyar nehişyar bibû, bi ciłkên xwe ve helavê bû. Serê wî şor bibû erdî. Erzinka wî ketibû ser singê wî. Miriyekî neveşartî bû.

Xudanê rîha sitleka ava tezî bi leşî da kir, cih de ve-ciniqî, mîna yêkê nivistî û kabûs lê bikin qîrr û hawar.

-Helbestvanê law xwe berhev ke, bo programê heme rengê pişkoka reş, hah, hah..!!

Ne...ne...Bextê Xudê bes e, bes e e..e..Ez, dê helbestekê ji we ra bixwînim.

-Lawê mino, ci hewcey van xem û êşan bû. Li ber-ahiyê, da berê xwe dê weca xwe. Hizr û bîr ci ne li ber kursîka me ya delal! Em bera di helînîn. Vêca çawa tu dê xwe li ber me girî?

Xudanê rîha, cixareyek berdayê û zengil lêda. Du nobedaran pêkve dan di jor ve û gel yek gotin:

-Belê ezbenî. Yek ji wan zelamekî zelam bû. Singfireh,

bejinbilind, leştijî weke gamêşê. Yê dî bi çavekî bû. Mirov ji nav çavêن wî yên bi tirs, ditirsya.

-Hişyarê delal, mîhvânê min e, bi bin jora jimara çarde û law guhdariya wî bikin, baše!

-Belê ezbenî, dê we bit wekî te gotî.

Hişyarî her berê xwe da wê oda law lêkdayî û raêxistî wî textê eve şes şevan li ser dinivit. Hizra xwe di wan her du nobedarên li ber derî kir, hêdî bo xwe got:

"Erê ma ta kengî em dê di bin destê van dehban ve bibîn?

Zengilê lêda, Hişyarî dergeh vekir. Xudanê rîha bi keyf da di jor ve: rengê te gelek xweş e Hişyaro, xwe lêk bide da biçîn demekî kêm yê mayî bo dest pêkirina fêstîvalê

-Kerem ke, da biçîn ez amade me.

Holeka bêqam mezin bû. Tijî xelk bû. Kursiyêن pêsiyê hatî bûn hindakirin bi komek serêن mezin û dêmêن tarî, Ronahî yên hemereng li holê bi şehrezayî belav bûn. Mişe û nerêن êzgeh û televizyonan amede bûn.

-Xûşk û birayêن hêja! Hozanvanê siyê, hozanvanê Kurd Hişyar e, bila kerem kit. Bi bawerî, Hişyar bi ser depê şanoyê ket. Nêzîkî mîkrofonê bû, çavêن wî bi xelkê ketin, hêdî, hêdî wênêن Newroza par di mêşkê wî da dileyizîn. Ew hozana li wêrê xwendî hat bîrî:

Çiyayêن me deng vedin, dibêjin xwînê ji welatê xwe ra birêjin davên tavê çava disojin dê sirûda şêhîdan bêjin...

"Kanê ew roja pîroz? Kanê ew heval û hogirêن ji dil? Kanê ew dîmenêن bêxêrê befrîn? Xabûro piir evîno ka,

ka tu çend ji te û mişêna te xerîb im . Welato soz bit, ez tola xwe vekim eve xweş delîv e. Ma jîna buhar lê ne-kenit. Ew jî jîn e? Ma teyrê di gel reva xwe nefirit bo çî ye?"

Bi kerb û kîna çiyayî, Hişyarî, bi her du çavan stêrk li wî wêneyê mezinê di holê ve girt û destê xwe yê çepê di-rejkirê, û bi cergê sotî got:

*Xwînmêjo
Dilreş qirêjo
Sewda sero gêjo
Tu çend law û genca bikujî
Hindî sera li serfiraza bibirî
Hindî wek sa birewî
Dê mînin ser viyana vî warî
Heta tu birizî*

*Xwînmêjo
Dilreş qirêjo
Sewda sero gejo
Çend tu me ji welatî dûr bikî
Çend tu para li me bireşinî
Çend tu bi top û tank û firoke bî
Tu neşêy viyana vî warî
Ji dile me bînî derê
Tu neşêy peyvên viyana Memê
Ji dile me bînî derê
Tu neşêy peyvên viyana Memê
Ji dile Zînê bavê derê*

*Xwînmêjo
Dilreş qirêjo
Çû zemanê berê
Weke berê li binê gerê
De herrê şoreşvano herrê*

Demê Hişyar, ji ser şanoyê dihate xwar, çar nobedar li hîviyê bûn. Destêن wî girtin, mîna benîştî pêve nivîsan, di dergehekî nihêni ra birine ji der ve. Mezinê wan gotê:

-Xwelîbisero, tu nabêjî min ci gehiştê te, tu dijî me a-xivtî? Kî dê bêjite te aferîn?

-Bawer bike, ne bi min e, ez çiyayî me û ez neşêm serê xwe çu çaran şor kim ne xasim bo xwînmêjên wek we.

-Tu dizanî cezayê ci ye?

Serê xwe hejand û bi bişkurîn ve got:

-Mîrin were, wek pêlên Xabûrî were
* * * * *

Li wê şevê, girtî hemû kom kirin, li pêş çavêن wan, ew werîsê rûs kirin hefka Hişyarî û helawêstin.

Çu stêr ji esmanî neketin xwar û nevemirîn. Lê stêra peyvîn Hişyarî bo yek û du vedigêran û dibiriqîn:

*Ez im xortê Kurd
Rêvingê li serê riya
Dê kim ci ya min viya
Qet nakevim bin piya*

Seetek li cem nojdarê şadiyê



Seetek li cem nojdarê şadiyê

(Wey bo şadiyê- were jor û janan bihêle- Şadiyê... Bibe)

Min ew payv e di nîva depekî ruhinkirî bi gilopek spî,
li ber dergehê avahî xuvandin...

Ji mî je were min hez dikir, ez herim cem vî zanayî
derûnî. ew ê dibêji:

"EZ şadiyê bo bergera nêñ xwe peyda dikim."

Erê hûn vê axiftinê bawer dikin? Yêkê ji we eve za-
nayê derûnî dît? Kî dibêjit ew zana ye? Ew çîma ez ji ge-
lek tiştan bê bawer im ?

Duwanzdeh peykan ez serkeftim, demê ez li destê rastê zivirîm, eywaneka biçük bi qenebêt kevn û pênc kursîkên tozgirtî û mîzeka bê ser û ber, çend kovarêñ biyanî li ser, ketin beranberî min. Ez dişêm sûnd bixum, evî nojdarê derûnî, ev tiştên kevin ên jî "Bazara Hereç li Babil topî" kirîn, dilê bajarê bi tenahî nivîstî li ser her du lêvên Dicleya xêrê.

Min hêv kire odê û dîwarên bêhna genî jê difirî mîna çerêmê seyekî mirî berî çend rojan. Li dîwarê beramberî xwe, min kevalekê, seyekî, bi dest risimkirî dît, yê bi keyf, yariya di gel pişikekê dikit. Erê ez jê bipirsim, çî ye ramana vî kevalî dimê diçime jor? An jî dê tûre bit? Lê, dibêjin nojdarêñ derûnî zû bi zû nabin û eger tûre bûn, xwe jî xwe bavêt û termê wî bibit sewik, li ser lêva cadê, da roje di, rojnamêñ spêdê behsa mirina zaneyekî bi lîmet di kavdanêñ tarî de bikin û seydayêñ pişka derûnî li zankoyê ji şagirdêñ xwe, daxwaza nivîsinêñ berfireh li ser vê mirina mezin bikin.

Bê guman ez dê çênd heyveka bim mîhvanê pîrsiyarêñ polîsan û dadgehê. Çunku ez ne ew kesê bi tinê bûm, yê sera wî dayî û we.. Hîviyan jî te dikim nojdarê delal, camêr xwe ji pencerekê ne avê berî tu min bibînî.

Min toz ji kursîkê da guta û hêj ez baş li ser ne rûniştim em pêkve ketîn û me dengekê nexweş tijî eywanê kir. Yekser ew dergehê li beraberî min vebû. Zelamek jê derket, bi pantolekî şîn û gumlekekî gulgulî, xîç kîşek spî mîna pirça li dûr çenîkêñ wî. di destê rastê da bû.

- Ma tu agehdar nabî berî bi rûnê? Ma te nedît kursî bi tinê bi sê piya ne?

Bi axiftina xwe di gel min, mîna yêkê di gel zarokekê baxivit, bû zanîn simbêlên min, binê kebê min heta lêva xwarê reşkirî ne. Awirî yên wî xerîb bûn, di gavê da çavêن xwe diniqandin û vedikirin.

Bi rastî boyinbaxa wî cihê kenî bû. Kesk bi rengê darê û rismên kaxezî mîna sînêleyan li ser bûn.

-Bibûre ger min tûre kiribû....Bawer bike min baş berê xwe neda pêpkên kursîkê.

-Bi rêzgirtin û tazehî, min we gote wî zelamê rawestiyayî li peşîya min.

-Min kursîka duyê bi destmala xwe ya nehatî şûştin ji eyniyekê were. paqij kir û ez rûniştim.... Ewî bi awiriyêن pirr pirsyar berê xwe dida min û peyivî:

-Te rîpeka hey, ma ne we ye?!

-" Eger min rîpek neba ez da hêm vêrê çi?"

-Belê... û divêt nojdarê derûnî bibînim eger delîve hebit.. Bi xwe girnijîna wî jî, ne girnijîn bû. lê sîtavka girnijînekê bû..

-Kerem ke were jor. Ez ew bi xwe me. Min hizir dikir evê li beramberî min rawestiyayî, yeke ji harîkarên wî, an sekretêrê wî ye... Rûnişt li ser kursîka xwe ya zivirrok, min bawer nedikir vî nojdarî, dê ev kursîk e hebit...Min hizir dikir bi tînê emîndarêن giştî û mirovên, gelek mezin û zikstûr, li ser van kursîkan dirûn in. Bê lêkdan hindek kitêb li ser mêza wî belav bûn ...Li ser serî, şiklekî rengîn ê mezin bû zarokekî çiplaq tazî min a, an te an ewî, demê em li jiyê wî. Digirnijî bo çi ne.. An jî bo ge-

lek tişta em nabînin û nizanin ci ne. Xozî zivirîbam za-rokekê sava.. Weye bo jîna zarokiyê ya xweş li ser lêvên Xabûrê şîn û civaniya bejna spîndarêن bilind, bê wes-tiyan û hîzir û alozî çend xweş e zarokî!

Du xîçen ne wek yek li ser defttera xwe ya biçük kêşan. Xîç kêşank li ber nav çavêن min bilind kir û bi dengekî tij mîna yê seydayê hijmarê, ewê her becilkên mela dihate mektebê û şâşka wî ya sor hêj ya li bîra min dikir gêrrî çend ma dersa xwe nezanîba, an me tiştekî biçük xelet kiriba. qet êciz nedibû ji lêdana me bi wî heyzeranê jê dûr nedibû wek şâşika wî, şûna lêdane wî li destêن me wesa diyar dibû, gelek caran em digrîn... Em büyük bûn û sira çiyayî nedizanî ci ye zarokî...

-Navê te.. Jiyê tê.. Şolê te!!

-"Eve ci ye Xudêwo, ma em dihola dadgehê we ne? Erê min gotinek kiriye û ez nizanim? Ma hewceyîyek bu vê rîya reqa pirsyara? Tîrsa min ewe, ne ku nojdarê min eve dîn bit, Xudêwo sebrê bide min."

-Li min negire... Ma pêtivî ye tu bizanî? Ez dibînim eger hema yekser astenga xwe ji te ra bêjim çaktır e.

Tibla xwe ya beranî kir di difna xwe da, du mû jêkêşan. Destê xwe bikaxeza li ser mêmê paqij kir...pêlên kenyê danpeyek û bi kotekî min şiya kenya xwe de bix-endiqînim, ma kî nabêjit ew da wê xolîdanka şûşeyî ya ci şiv in warêن binkên cigara û zilkên şixa tê lê nediyar, di min werkit û têr xebera bêjit, eger keniyê min der-keftiba.

Ewî zelamê li beramberî min got:

-Belê... Belê... Zaroyê min ev pirsyara zor pêtivî ye bo nojdarê derûnî, ds harîkarya wî bikî bo çareserkirina ne-saxê xwe û nojdarên dijî hîzrêن bavlovî, ewê şolê di-hebînin

Ez nizanim çewa di wê gavê da ev nav e hate bîra min: Karbov, Ereb Şamîlov..Erê ez pirsyara ûştê zîyana Karbovî di palewanya cîhanî ya setrencê jêbikim? Ne,ne. Hewce nîne çinku ez baş dizanim kes li cihê xwe namînit hemû jiyê xwe eve yek e ji tiştên siruştî di jînê de. Ew çima ez ji çêweyê Şamîlovî têr nabim li xwendîna destana "Kelha Dimdim"? Ew çima wêneyê qarmanê wî " Xanê Lepzêrrîn" ji pêş çavên min naçit? Xwezî minzanîba nihêniya gazîkirina wî bo min, erê ev nojdarê derûnî dizanit ci ye nihêniy gazîkirina wî bo min çaxê hût ji avê derdikevit û bo ezmanî difirrit?!

-Kurdo şimdîn kerîm.

-Çi...Gerdûn?

-Kurdo..Kurdo ... kef, u re de, o kurdo

-Erê, navê te neyê xerîb e? Anku... Anku ne piçekî gi-ran e?

-Ne, navekî sivik û sanahî yê tine di gel min bêje Kurdo, Kurdo û bînê çendê xweş e. Mina noke baş ya li bîra min e ew roja se13ydayê amadeyê bi diltengî ve ji min pirsî:

-Erê ci ye ramana Kurdo...Ho ...Ho Kurdo!
Ez girnijîm û bi rîzgirtineka mukim min gote:

-Her mîna bersiva te, eger yekê ji te pirsî çi ye ramana
Ye' rubî seydayê min yê birêz.

Evî seydayê min hej pirsyar û gengeşên min nedikir. Ya rast jî ez di dersa wî da serkeftî bûm. Ez dibêjim evê çendê jî mîşkê wî diêşand...Nojdare der û nû jî dilê xwe bi axaftina min ne vekir, her wek saydayê amadeyê...

-Û jiyê te?

-Sîh û sê sal û pênc heyv û çend rojek, her wekî di lîsta hukmetê da nivêsi, eger rast bit. "Erê tu dizanî, ez êş girtîyê gumaniyê me ji rastiya hemû tiştan?" Nojdarî ev zanîn e li ser wê kaxeza biçûk dînvêsin...

-Nuke li kî derê akincî ye?

-Li taxa Qe...!

Erê ez bejime li taxa Qereçan? Eve ye ew navê min gulê bûyi ewe ez hatim vî bajerî û xelk hosa dibêjnê "Taxa Qereçan" belê hindek Qereç yan lê hene, bo xwe digerin bi aşkerayî û hindek ji jinkên wan şolên pûç dikin li bin ronahiya tavê, û ev tişt e her wesa li gelek tax-ên dî jî peyda dibit. Ew taxêt xelkê taxa me dibêjnê "Tax-ên maqûl " her wasa biçûkên qereçan şolê buyaxa pêlavân dikin, pêlavân mezinên dirwînên li pişt mîzên lêkdayên mirov xwe têra dibînit û odên xweş û bêñ fi-reh. Ew mirovên qet nahêlin delîve ji wan biborît bo dizîna diravê dahêrê û demê kifş dibin, wê diziyyê bistûyêñ hindek dî jî xwe biçûktir li peyska dahêrê ve di-hêlin...Erê ma evêñ hene ne Qereç in?

Li salên dûmahîkê me gul`(bihîst) navekê wî bû, bo taxa Cezaîr dermangeha cezaîr, wênegirê Cezaîr, dibistana Cezaîr, Cezaîr...Cezaîr...Ev nav e ji kû ve hat? Kê rakir? Erêê dabit li ser xatra xudana milyon şehîda di qada ronahiyê û serbestîyê de "Cezaîr" êy an jî egereka dî ya heye?

-Te xêr e? Te bersiva min neda!!

-Li min negire, taxa Cezaîr...

Erê tu dizanî, eger sê se'etak li ser yek baranê lêkir, taxa me di nîva avê de dixendiqit, xirr kolan û cadeyên tijî kur hinda dixin. Zarokên taxa me xwe diêxnê bi kêfxweşî, wek kêfxweşîya zarokên taxên ava û maqûl û demê xwe di yên çimentokirî û ronahiyên hemû reng li diruan..Erê nojdarê berketî tu dizanî zarokên taxa me xeker û quesên reş reş dibêjine daykên xwe. Her wesa daykên wan lê vedigérin û delîveyeka zêrîn e ji qîzen sinêle ku baqêن xwe nîşa tolaza bidin.

Rêveberê şaristanîyê soz dane xelkê taxa me, ku ji dil dê hewil bidite det bu guhirîneka mezin, belku cadeya serekî çêkin û dabit komen pîsatiyê li serê kolanê nemînin.

-Ha..Ha..Taxa ..Ez baş nas dikim ber destka me ya mal ji wê taxê ye, mala sêyê li destê rastê, nêzîkî "Nexoş xan ya Şagirda" navê wê Zeyneb e. Rast e nexwendewar e lê bêqam zîrek e, tu nas dike

Ne, ne!

-Û şolê te çi ye Kurdo?

-Harîkarê emînê pirtûkxaneya giştî...

Amîretekê navincî yê tomarkirinê ji çavika mektaba xwe ûna derê, kasêtek kire di zikê da û da şolî...Her dû çavêن xwe yên veşartî li pişt berçavka reş û stûr bilind kirin û got:

-Da ez bişêm bi mikumî çareserkirina te bikim, divê tu rastgo bî di axavtinên xwe da û hemî tiştan bi azadî bêjî...Ka bo min bêje ka te çi ye? "Û hemî tiştan bi azadî bêjê...wey bo azadiyê. Baş anî bîra min, demê min ji dil dest qutayn bo Kurrê Ademê Tunisî,demê li berahîka kurtehozanên xwe gotîye: Çinku azadî gelek mişe ye li warêن me, em dê bo dewletêن dî yên cihanê hinêrîn."

Piştî min xwe dirust kirîye bi rûniştina xwe, ez bi rehetiyê hesiyam:

-Eve du sal pirtir in, xewn hêrşa didin mêskekê min. Ez xewnêن pîs dibînim heta ku êdî ez nizanim rehetî çi reng e! Her dem serê min gej e û tijî alozîn e, ta hindek caran ez nivîstî, radibim û ji cihê xwe derdikevîm û bi reve diçim û gelek şola dikim û min hay ji xwe nine...Kabûsen pîs yên di nav leşê min da peyda bûn, li hemî leşê min diçin û têن mîna xwînê, min dîbin û tînin viyana xwe. Ez êsîrê wan im...Hizir ke, jina min, belê jina min, ewa ez bêqam hejê dikim, min viya ez bi xend tiqînim û ez nivîstî, belê ezbenî û ez nivîstî min viya wê bînim derê direwin, lê dayka min got, eger ez li gel qêrrîya wê negehiştibam, noka kelexekê bê rih bu. Er wesa deyka min dibêjit, gelek caran pişyî nîva şevê tu ji malê derdikevî, demê me divêن rê li te bigrîn, tu dibê gawirekê benî yê bê wijdan, em ji te ditirsîn xwe ji te dûr

digrîn... çavêن te dibin dû pelên agirê ges, dême te têk diçit. Tu dibê tirsek mezin, gelek mezin... Caran zû dîzivrî û caran ta bangê sipêdê dimînî û naêy. Têşta xwe dixuyê û digirmijê û dikenê heçku qet ci ne qewimî. Nojdarê şadiyê, tu dizanê ev xewn e ji bîra min qet naçit Şevekê min nehingekê mezin dît, ye ji rubarî derdikevit û berêxwe didit min, difirrit bo esmanî û nêzîkî ewra dîbit, jê diburit, hedî hêdî bu heyva ges jê nêzîk dîbit, devê xwe yê fireh mîna şikevtê vediket û heyvê dadûrit, ew ronahîya gesa law hinda dîbit, tarî min û er dû esmanî diririt, û careka dî dizivrit bo rûbarî.

...Ez hevcarê bapîrê xwe hildigrim, rêya rûbarî digrim,. da wî bikujim, heyvê jê bistînim ji nişkekê ve ez gurgên têhnî yên xwîna mirova dibînim li peşya xwe û diberdin min, ez bêhemd piçekê paşve dizivrim, lê xanê lep zêrîn li min dikit qêrrî:

-Paşve neçe Kurdo... Ez dê harî te kim...û mezinê gurga mîna mirova diaxivit:

-Goştê te xweş e lawo...!

Êrişekê didin ser min... Ez di cihî da hişik dibim, pêstirk min digirt rengê min dihête guhîn, peyv? di gewriya min de dimrin, û Mîrza Mehemed li ser pişa hespê xwe yê boz dihêt û min ji erdî hildigirt û diavêt pişt xwe û min dideynit cihê ez lê dijîm... û û hişyar di bim, ne xanê lep zêrîn ne Mîrza Mehmûd, ne hespê wî, û hêşta dengê gurga yê di nîva herdûû guhêن min da deng divedin... Ez ji nav nivîna derdikevim, jina min bi min dihesit:

-Ez hîvîyan ji te dikim. Ne derkeve!! Tu bi Xudê kî ne derkeve!! ci ye? guneha vê jina nizanit tama şadiyê çawan e?

Bawer ke seydayê nojdar, min ha ji xwe nîne, dema ez li zarokên xwe didim û nivînka disojim û dikevîn nav tiştên malê da û dergehêن cîranan diqutim

Yek dibêjî:

-Bihêlin.. Yê dîn bûye
Yê dî dibêjî:

-Erê çîma em nahavêن nexoşxaneya dînan? Ma dîn bi .
saxin? û pîremêrekî piştxûz li wan vedgêrit...

-Dê bihêlin hey mala wey nû.. Nê xweş mirov e!

Erê... Tu çi dibêjî nojdarê şadîyê?

Serê xwe her hejand, berçavka xwe êexist, deyna ser mêtê, hêj lêvên wî ji seryek ne rabûn da baxvit, zirêna telefonê ode tijî kir. Amîretê tomarkirinê rawestand, destkê telefonê da ber guhê xwe:

-Belê ... Ez im Êfan Razî

-.....!!
Wey Xudê, tu çi dibêjî, gelek herişiye, eve ez hatim,
hatim!

Şepirze bû gelek dest avêt çakêtê xwe û berçavka xwe
ji bîr kir ji leza ew diçû û gote min:

-Kurê min yê li trimbêlekê daye, noke yê li xestê, piştî
heft rojêñ dî were..

-Ez jî dûv derkeftim, kesek li eywanê nebû, ji bilî ci-
hêlekê bi dişdaşeyekî hewçikfireh, erdê eywana tuzkî

Şûşeyek hebka wek ewa di berika min da, min ji we
mezin kirî min qesta cihê rawestîyana pasa kir.

Min bo xwe digot "Erê rast e dîn im ! Yan di cîhanek dîn
de me? Û ez kenîm. Hindek rêbara hayji kenyê min bûn.
Bi rastî min şerm kir, û min biryar da ka ez bi piya bi-
zivirim malê, çinku êvareka xweş û fênik bû. Erê hûn
bawer dikin?

Hadîse, Rûmadî 1986

Zerî



Zerî

"Diyarî ye bo zarokêñ bajarê Qela Dizê yên ku li
roja 24.4.1974 bi firokêñ Îraqî şehîd bûn."

Zîqe zîqa çûçkan û bê gonahiya sava, digote zeriyê der-
geha veke. hindek dengêñ jê ne xerîb, ji navbeyna dar û
barê kesk, digehîştin kakilka dilê wê berî her du gûhên
wê. Dilê wê bi wan bist bistêñ nermîn ve hate nûsandin.
Berî dangêñ kirasê xwe yê teys teysok, ji giyayê bêhn
xweş hilgirit, gul dengê dergehî bû. Dema dargeh vekirî,
ew bi çilkêñ xwe yên xwendingehê yên paqij û rengîn ji
xwînê, dîtin. Navçavêñ wan geş bûn...

-Wey hûn bi xêr bêñ, xuşk û birayêñ min. Kerem bikin
werin jor.

Ka çaya her roj bi tazehî diçûn di rêsêñ xwe ve, wesa
bi jorî wê eywana fireh ketin, ew eywana mîna wê li
cîhana ewilî ne dîtin.

Dengê kewan û çûçik û bulbula vêkra bi awazek nazik vedigêra:

"Hûn bi xêr hatin behîstê."

Lemyayê, hîvî kire her du çavêن Zeriyê yên pir tenahî, mîna çavêن wê û bi vêriyeka evînî di pêsiyê ra bikit, jê pîrsî:

-Berî nûke min tu ya dîtî, lê ez nizanim kengî û li kûderê? Ne tu bûyî ew zaroyê tenbûrvan di gel wê tîpa Kurdî, ewa strana "Heval Hevaloşkê" pêşkêşî televizyonê kirî, li Newroza îsal ?

Zerî girmijî û yarî bi davêن pirça xwe ya dirêj kirin û bi sivikî bersiva wê da:

-Na xuşkê na, qet ez di televizyona vî warî de ne derketime... Lê min wênê xwe yê qurmîcî dît, heyvîn pêşesazî bar dikir bo hemî deverên cîhanê. Demê ew gulleyên giran bi min dikevtin, ez dihêram. Ez disotim.. dibûm xwelî. Careka dî destêن spî, spî mîna befrê xwe di min werdikirin , ez bilind dikirim esmanî. Careka dî ez dibûm ez. Ez im şahîda li ser wêrana bê wijdana bi ser min û hevalên min yên zarok da hatî. Ez jî wek we diçûm mektebe û min kitêbên xwe dikirin di cenê xwe de, min baş guhê xwe dida qelem û kitêb û şîklên xwe, ez bê-qam dilşad dibûm demê min li xwendingehê, di gel he-valên xwe sirûda "EY REQÎB" dixwend...

Ez gelek keyifxweş dibûm dema mamosta min, dayka min û babê min, ez maçî dikirim...

Ji mêj were ev wêran e li me qewimî. Dibit hingê hêj hûn nebîbûn yan we nedizanî mekteb çi ye!! Yan jî hindeka ji we bi şadî, li baxçen xwe yarî dikirin... Wey bo wê wêrana bi serê me da hatiye... Wey babo wey..!

"Hinde" xudana neh salan viya baxivit, xwe û hevalên xwe bo Zeriyê bidit niyasîn, lê ewê ew delîve bo nahêla, dê bêjî, ewê dizanî çi di dil da ye û çi divêt û gote wan:

Ez we hemiyan nas dikim... Ez dizanim hûn wek min şehîd in. Min kuştin û wêrana mekteba we dît û ew tirsa ketî dilên hejar û jaran. Ez dizanim dêbabêñ we heta gelek şevan neşen xewê bibînin. Hûn her dê li nîva dilên wan bin. Lê demê hûn sera wan didin, dê bêhna wan hêt û xemên wan dê birevin, demê geşatîya asmanî di çavêñ we ra dibînin.

"Sevsenê" xudana keziya zer, bi keyf axivitina wê birî:
-Ee..ee..eerê ezê sera dayka xwe dim û maçî kim û em her roj?

Zeriyê her du destêñ xwe dirêj kirin alekêñ wê yên sor, çend çipikêñ xwînê jê malîn û gotê:

-A,A,A xuşkê a.

-Tu sera mala xwe didî

-A, ez sera wan didim, dema ez xerîb bibim û her car ez bo xwe qevdek "NÊRGIZA" ji wêrê diînim.

Basimî şînwarêñ rondikêñ xwe malîn û gote Zeriyê:

-Tu ji kû derê yî?
Keyfekê xwe li nav çavan da:

Ji pişt çiyayêñ befrê girtîn, nîzîkî kehniyêñ sar û zelal, ji "Qela Dizê" ..

Nizanin ji kûve dengekî nizm hat û giftûgo li nav beyna wan birî:

-O Zerî, zarekê mektebê bibe ser rûbarî, da xwe bişûn, paşî çilkêن nû bide wan, baş e zerî?

-Belê,belê bi rêzkirtineka mikum Zeriyê bersiv da..

Û li pêşıya wan diçû bo girnijînê mala xwe li ser lêvên wan deynabû.

Mûsil 1987

Şeva Baranê



Şeva Baranê

Ma çi ji baranê xweştir heye?

Te serê xwe bi tiblên xwe şeh kir, destê rastê bi simbêla dayîna xwarê û ji odê derketî û te dergeh girt, kilîl bi depê bê reng ve helawîst.

Te berê xwe neda wê eyna mezin ewa ketî beramberî te. Tu dipeyska da çûyî xwarê ,hewce nebû dergehî vekî, kitek wî bi xwe li taq bû.

-Pa bêhna axê xweş e piştî baranê!

Te mîhka serî ya çakêtê xwe girt, her du destê xwe kîrine berûkên pantol bi tinê te di gel xwe îna .

-Dê rêvin bî, evê gewir jî bibe...

-Eve bes e, ez gelek gîro nabim. Deh diwazde pêngavek li ser teqnê, te havêtin tu gehîstî lêva cadê, te berê xwe da çiyayê bilind ê mit û te ji dil bayê baranê helkêşa.

-Aah pa xweş e! Ronahyêن cadê helbûn û baran li ber direqisî. Bazar di xew çûbû. Tu kefxweş bûyî bi çibkên baranê ew ên silav dikrin pirça te ya sivik. Heta serê bazarê tu çûyî, boriyê alê dî û pê da hatî xwar.... ew qemara reş sê-çar caran hat û çû...Tu li ber wê çayxana biçûk

rawesta yî.

-Bila sivik bit. Te av vexwar û tu rûniştî ser wî textê ji der ve, ewî getê xîvetê yê li hindav serê te vedayî, tu ji baranê bê bar kirê, hindî tu şiyayî te her du pênêن xwe dirêj kirin...

-Tu bi xêr hatî xalo.

-Xêrandar bî. ,ez jî te çaya xwe netêkvedayî, ew trumbel e beramberî te rawesta, te piyala xwe bilindkir û firek li çayê da.

-Tu çend hej çayê dikî hey malnexirab!

-Û hej xwînşirîna xwe jî dikim.

-E heme dê newe vîya nebêjê! Dê vexwe, vexwe hêj sar nebûyî

-Bila sar bit, dê germ key ve eynika min

Wela babo xweş hejê kiriye!

Tu kenî û te serê xwe bilind kir, ew mirovê di gemarê da rûniştî, rik û rik li te difikirî. Te du derhem da nav çayçî û te gotê:

-Tu bi xêra xwe yeka dî jî naînê?

-Wey ser çavan xalo... Te ew mirov e hêla wesa û êdî berê xwe neda alê wî. Lê ewî neşiya xwe bigirit û bi kerb ji trumbelê derkeft û qesta te kir, bi dengekî şidayî gote te:

-Tu bi çi dikenî? Çayçî piyala te deyna ser wê mêza asinî ya sê pêyî, hêdîka te têkveda...Ewî neşiya xwe bigirit:

Ma tu ke rî te hay ji min nîne? Te kevçik ji piyalê îna

derê û te kire di bin kaskê da û bi nermî gotê:

- Tu bi çi heq vê pirsê ji min dikî? Kêm mabû da çavên wî ji gogilkê êne der, destê rastê dirêjkire te û got:

-Çinkî tu bi min dikenî!

-Ez bi te dikenî?

-Erê., Erê.

-Ma ez te nas dikim, da bi te bikenim?

-Ma yek heye ji vî bajarî min nas nekit?

- Lîez ne ji vî bajarî me.

Demê te we gotiye, sist û sar bû. Bi dengekî nizm û nerm gote te:

-Pa tu ji kîj bajarî yî?

-Bi bişkurîn ve te gotê heqê vê pirsê ji te nîne, ma ne we ye?

..... Te destê xwe bi berûka xwe û pakêta cigara dîna derê û yêk jê berdayê, paşê te paketi ber bilind kir:

-Kerem ke...

-Ez vî tuxmî nakêsim. Piçekê bêdeng bû û hizreka dî ji te kir û yekser gote te:

-Hîvîdar im tu êciz nekirbî! Te berê xwe da dêmê wî yê esmer û carkadî tu ji dil kenî. Te çi negotê... Te çayek dî jî vexwar. Te hûrde de bidê çayçî, te gotê:

-Derhemek te mal li min xal.

- Çiyê min nemaye li te xalo. ya dûmahîkê ji kîsê min e...

-Bijît! Tu rabûyî û te rêya xwe girt, demê tu gehîştî termên telefonên bi rêz , te viya telefonekî bo mal bikî, lê hat bîra te, derhamvi te nemane. Cardî tu kenî û te serê xwe bilind kir esmanê tarî û tu ji bayê sarê baranê sil nebûyî û di girnijî ji dil.

-Babo bi Xudê baran xweş e !

Dihok 13.3.1990

Şehyana Çuçikan

Şehyana Çûçikan

Min hest kir, giya ji wan ra girnijî, demê lê bûyn mêmvan.

Tirojkên roja geş silav li çiq û belgên darêن bilind dikirin.

Demê enîşka xwe danî ser rehnê wî ew zelamê di dişdaşê pîs ra berze, xwe nîzîkî wan kir.

Diviya wan bi awirîyêن xwe bixut. Du, sê, pêngavek di navbeyna wan da bûn, demê ew li

ser giyayî rûniştî. Kerbêن giyayî vebûn û tiştek got, li pêşiyê min nezanî ci got, lê dema ewî

destê xwe dirêj kiriye gulekê da bikit, giyayî qîre kirê:

-Çima tu hatî vir?

Ewî guh neda, heçku ci gulê nebûyî an ji zimanê siruştî nizanît.

Mêrkî stêrka xwe li nîva laşê wê jinka biyaniya keyf-xweş bi çavê rojê û giyayê Mûsilê jêhatî girt.

Gelek keyfa çûçkan bi wan hat, biryar dan şehyanekê ji wan re saz kin.

Dest bi stranêن xweş kirin. Revdêن çûçkan ji darêن nîzîk qesta wan kirin.

Çûçkê got:
-Xerîb in!

Û serê xwe bilind kir bo çavê rojê.

Çûçkê got:
-Evî mîrkî halê wan nexweş kir. Ci ji wan divêt

Xwezî ji wê rê çûba. Ev kesên hosa bi çavşorî zêrevanî li xelkê dikirin, min nevên.

Te divêt ji vir derêxin?
-Di cih de ez ê maçekê bidime te.

Çûçkê dest bi awazeka nazik kir û li çarkoşeyî kesk firî. Revdêن çûçkan gehîştinê û bi nizmî li dor mîrkî difirîn.

Mîrkî viya wan biêşînit, lê zêrevanê baxçê her zû amade bû:

-Bi hêle şehyana xwe temam kin. Tu dîn î, har î?
-Şehyana xwe? Wasa mîrkî lê zivirand.
-Belê şehyana bi her du evîndaran.

Di wê gava kurkî keçik maçî dikir, çûçkê maçek da he-valê xwe.

Min hest bi xweşiyeka mezin kir, mîna rûbarekê stranan bêjit, lewa hêdîka min jî strana "lê lê gulê, lê lê" bo xwe vedigêra.

Zarokê Befrê



Zarokê Befrê

Her du çavên te zîq lê bûn. Te xwe xweş kir bo a-xiftinê, lê tu bêdeng mayî û bi hêbetî têfikirî, li bin barê pişt lê qoskirî.

Befir ji nav kenga wî bilintir bû. Binê telîsî vî ruyê befrê dikevit. Dêmê wî sor bû, mîna sêvên ravîna. Kumkê wî, sêr û guhêن wî veşartî bû.

-Ma tu ji Xudê natirsî, hey mal ne xirab?

Eve bûn peyvên te diviyan bêjî babê wî, lê te daîran, mîna gelek tiştên tu wan heyaman da diîrî.

Dilê te bi ezman ket û gote te:


-Xwe neke pêkenînkê wî. Da bêjite te eve ye jiyana me, divêt ji nuha fêrî şolî bit. Tu yê kudanêن me dibînî, kî nabêjît vê gavê, yan gavê dî, ez dê çim û çim, wek dûkêla cigarê. Erê ma kî nabêjît, dê bêjite te:

-Hema hûn sax bin, bo ewî seyê mezin, hey ser şorîno!

Dê bêjit dê wêrit we bêjit. Çiyayî hemî tiştan dibêjin. Ji te borîn, lê te neşîya çavêن xwe ji barê wî yê giran vekî, heta nuhalê ew daîrayn.

16.3.1988

Heyhat



Heyhat

Devê wî bi lûliya henefiyê ve nûsa bû. Pirça wî bû xwar û enî lê hindâ kirbû

Demê serê xwe rakiriye ez bo girnijîm û min qesta wî kir, di cîhê xwe da rawesta û nelivî:

-Bi Xwedê min çu nekirîye, bes min av vedixwar!

-Netirse xalo, hêj vexwe.

-Hey, tu Kurdî dizanî.

- Ez Kurd im wek te.

-Panê eskerên vêrê bi Erebî diaxivin!

-Ez jî wesa di gel wan diaxivim.

-Dê bî hevalê min?

-A...

-Navê min Heyhat e, subehî siharê ez ê mastî bo te bînim...pa navê te çi ye?

-Mihemed e.

-Navê babê min ji Mihemed e.

-Silava lê bike başê?

Serê xwe nizim kir erdî û du rondikan dan pey yek û bi alekên sor û nazik hatin xwar:

-Par çû û hêj nezivirye.

-Bo çi?

-Ez nizanim, lê dayka min dizanit. Hevalên wî dibêjin, gelek hej axa dikir.

Min rondikên wî malîn û maçî kir, bi dengekî hejar gote min:

-Xwezî te şiyaba hindek "şekir û çayê" bo me peyda kî!

-Bilanê.

-Heyhat, Heyhat weke mal dayka min tu diyê

-Bi xatrê te, eve xuşka min e, ez ê siharê masî bo te bînim.

-Bi xêr biçî Heyhat...

1988

Seredan



Seredan

Bêyî dergehî biqutit, da di jor ve û destê xwe bo dirêj kir.

-Eve kî ye?

-Bibûre, jinik li cem me naçin destê zilaman ne xasim yên biyanî, kerem bike!

Bi şkestî destê xwe kêşa, viya girnijinekê li ser lêvên li ber tehra tavê kelişîn, biçînit, da şerma xwe veşîrit, lê neşîya.

-Te xêr e?

-Ma tu pêşiyê nahinêrî çayekê?

-Eger eve çayxane ba. li ser çavan. Berê xwe da nav çavên wê yên nerm û law. Çavêن hîz, bi tam sarîyeka aşkira bi singê wê ve helawîstin. Ew rabû "dûlaba asinî vekir, deferek jê anî der, vekirî da vi mîrikî.

Temaşeyî defterê kir.

Nav:

Kar:

Egera seredanê:

Mêjû

"Diyar e ev jin e bi yek carî ne wek ya berê ye"


Defter da yek û li ser mîza di navbeyna xwe û wê da hê la:

- Ya rast min diviya bibit seredaneka nasbûniyê...
Ha...Ha, hah....

- Tu dişey axivtina xwe binivîsî? Gelek tengav bû,bê ser û ber û xûhday ji odê derkevit û " bêriya res, li ser mîzê hêla.

14.7.1988 Bêgova

Mesîn



Mesîn

Demê sîrêni ji dergehî hatî, yekser her du bezêni mesîni
bi çavêni tijî kinîşt berê xwe da wan.

Yekî lûlî girt, yê dî destik.

-Berde kuro berde!

-Pa bi Xudê tu bimrî bernadim.

-Ma ne şevê dî te bo dagirt, îro dora min e.

-Dê here, min bawer ne kir ez dê ji berî te bigehimê.

-Çu mirovek zinx û tu, dê bigre, bigre.

-Mala minê bêhna gulavê ya ji te difirit!! Du sê pêngavan pêşve çû

"Erê bi rastî eve ez im"?

-Kerem bike ezbenî, kerem bike.

Li pêşıya wî çû.

Ew di dîv da.

Sê çekdar di dîv wî da.

Mesîn li cihê destavê hêla bi devekî beş zivirî.

Ew çû jor.

Her seyên din, wesa nizîkî wî bûn

Ku bê minet, di şiyantir û fisêن bihijmêrin.

Çavêن wê koma nîv mirovêن li hîviya êmîşê rojane. li
wê şanoya rojane bûn.

Awiriyêن wan, bê deng digotin:

-Erê ma eve jî mirov in?

1988

Wexer



Wexer

Simfoniya şemenderferê hêj wek xwe ye, awaza xwe ya bê guhurîn "çik...çik...çik...çik" bi dilê xwe ya lêdidit. Her çende pêlên westiyanê û xewê li dor min dizivirin, lê çavêن min , hêşta nîvekirî ne, mijûlankên boşen direj, caran dien xwarê û yên binî diramûsin û jêk vedibin.

Ew kovara di dest min da, hêdîka min deyna ser wê mêza spî ya biçûk li bêr singê min. Min ditûre da nekir, dirandî bû.

Bê rêz deziyên wê hatibûne xwarê.

-Festîvala îsal dê xweş bit, pa ne?

Min viya, tiştek dî bêjim, lê peyvan dan ser lêvan:

-Hemî rojên min di gel te festîval in.

-Bi rastî?

-Bi serê difna te ya delal.

-Dê min bêyî nav daristan û tavgên bajêrî û wan bazarênen Mûsilê, yên tu dibêjî, çavê rojê na bînin û tameka taybet hene.

Ma ne?

- Ser çavan kakilka dilî.

Erê, ez dê çi bêjmê, demê birayê min yê mezin rahêlit qêriya di gel jina xwe, bêyî hoyekî berkeftî, mîna her carî. Yan jî demê zarokên wî dibînit û nan di destan da kolanê

Erê, erê, ez dê bêjmê eve festîvaleda gelek taybet e!

Kî dibêjit, dê şêt xwe nizim kit "heneffî" ya bi tinê li malê, demê spêdê dest û çavên xwe bi şût.

-Rast e dayka te hej min dikit?

-Belê ciwanê, lê bi serê te, kes mîna min hej te nakit qet.

Erê, eger serê xwe bişût, dê şêt xwe li ber qîj qîja pir-êmizî û tengiya wî erdê bin peyiska, ewê em ji qasta di-bêjînê "SERŞO" bigirit. Hîvîdar im serê wê bi wî banê reşê nizim nekevit...

-Hê..Hê.. rabe em gehiştîn.

-Belê, Belê

-Sibahiya te bi xêr.

-Çi xêr li binê vê berriyê heye?

Nizanim gava destê min gehişt perda pencerê û min veda. Davên tavê bo dar qespên bilind girnijîn, û dabit bo xewna min jî..

1982 Besra

Ew û dil



Ew û dil

We got:

-Ez dê navê te li ser darê nivîsim.

Min got:

-Ez dê navê te li cihekî dî nivîsim.

-Dê li kû derê nivîsî?

-Bo te na bêjim.

-Tu bi Xudê kî bêje!

-Dê di dilê xwe da nivîsim.

-De veke û binvîse.

-Nê ji min dûr e.

-Ma ne di singê te da ye?

-Ji hestiya pêvetir çu dî têda nîne.

-Pa ka dilê te?

-Yê li serê çiyayekî bilind û eve ez ê çûm navê te lê binivîsim.

-Dê min di gel xwe bibî?

-Ka destê te cwana min...!

Mâsil 7.1.1990

Eve kî ye ?



Eve kî ye?

Heta vê gavê jî, ez nizanim bo ci min neşiya, çavêñ xwe ji dêmê wê yê pirr birfînêñ veşartî vekim.

Ew her du çavêñ şînêñ tijî jan, keziyêñ zerêñ têk alizî û tijî toza bîstanî, tu dikêşayê cîhaneka taybet...

Dangêñ fîstanê hinarî yê bê ser û ber, diketin ser her du kitêñ şimka reş. Destê rastê deynabû bin dewlikekî biçûkî duhnî, destê çepê jî li ser dergivanekî baş şidandi bû.

-Eve kî ye?

Bê deng te gote xwe.

Ne dûr e, eve ji xerdel û siyanîda bihara mirina" HEBBCÊ" verest bit.. dibit serû sîmayê wê yê damayî evê hîzrê pesend dikit. Belê pa ji kirâs û fîstan û rapêcana wê diyar e xelkê vê deverê ye. Ne dûr e hema ya vê deştê bit.. Xwezî min zanîba çîma ho ya mit û damayî.

Ma kî nabêjit ew û ev zarokê wê yê ser qijavij, ne ji nêçîra ENFALÊN REŞ rizgar bûye û hemû kes û karêñ wê, bi saxî li bin girêñ axa şefelêñ har û didan. çiq. Li biyabaneka bê xweyî û xudan. A.. ave jî çêdibit. Xwezi min zimanê kovan û janan baş zanîba, da min çîroka vê zeriya dêm payîzî zanîba!

-Bê zehmet kirya we...!

Dewlik deyna di danga xwe da û hêdîka destê xwe kir di paxla xwe da û çîzdank anî derê û dînarek asinî kir di destê şagirdî da. Her du çavêñ kurrê wê bi hêbetî man li wî dînarî. Xudê dizanit ka eve çend e vî zarokî dînarek nekirye di destêñ xwe da û wek zarokêñ xelkê dîtir çu tişt bo xwe nekirîne.

Demê Koster gehiştî avahîye SÎXURA. Erzinka xwe ji ser sîngê xwe rakir û berê xwe da dîwarêñ wî yên bi nivîsînêñ Kurdî xemilandî û hêdî hêdî pişkirîneka nerm xwe li nav çavêñ wê da û gote zarokê xwe.

-EVÎ AVAHÎ BABÊ TE DAÎRA DAWO..!

Zarokê wê got:

-EZ TU CARAN JI BÎR NAKIM O DA !

2.8.1992. *Dihok*

Naverok

1. Balûlka sekirê.....
2. Sibe bihar dê girnijit.....
3. Mirina Serfiraz.....
4. Seatek li cem nojdarê şadiyê.....
5. Zerî.....
6. Şeva baranê.....
7. Şehvana çûçkan.....
8. Zarokê befrê.....
9. Heyhat.....
10. Seredan.....
11. Mesîn.....
12. Wexer.....
13. Ew û dil.....
14. Eve kî ye.....

Ferheng

rex	cem
nûke	nuha
o da	dayê
sotin	şewitîn
ne soj1ne	ne şewitîne
serreqî	serhişkî
na kit	na ke
birsî	birçî
serşorî	sernizmî
girnijîn	tebesum
digirnijit	tebesum dike
hizir	fikir
zile	şîle
dişêm	dikarim
şıyan	karîn
li min ne gre	bibûre
rîhe	bêhn, parfîm
êzgeh	radyo
min divê	ez dixwazim
min viya	min xwest
bi rêzgirtin	bi qedr û îhtîram
xîç	xeteke kurt (-)
jî	umr, (jîyê te: umrê te)
tibil	tilî
gul'	guh li, min gulê bû: min bihîst
vêkra	pêkve, bi hev ra
nûsa	zeliqî
çu	çi

Hesen Silêvaneyî

Ew li sala 1957 li başûrê Kurdistanê , li gundê Tirkija, nêzîkî Zaxoyê ji dayik bûye.

-Li dest pêka sala 1980 dest bi nivîsîna kurdî kiriye.

-Helbest û kurteçîrokan dinvîsit.

-Li 1993 Dîwana xwe "Hozanên Sava" bi tîpen latinî çapkiriye.

-Li sala 1987 kurte romanek nivîsiye bi navê " Gulistan û Şev" lê ne çap kiriye.

-Ew di warê wergerê da şehreza ye. Komek çîrok û helbestên kurdî wergerandine zimanê erebî û li rojname û kovaran belav kirine.

-Ew li Duhokê sekretêrê Yêketiya Nivîskarên Kurd e.

-Endamê desteka nivîsîna kovara "Peyv"e.

-Nivîskarê kovara "Metîn" e.

Spas bo harîkariya:

- Babê Rastî.
- Hesen Koxî.
- Hunermendê hêja "Guhdar Selahedîn".
- Mamosta Xalid Xalid Koçî.

Hesen Sîlevaneyî



The Sweet Bread

Kurdish Short Stories
By
Hesen Silêvaneyî

ISBN: 91-87730-66-9
APEC